



# ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՓԱՍՏԱԲԱՆՆԵՐԻ ՊԱԼԱՏԻ ԽՈՐՀՈՒՐԴ

## Ո Ր Ո Շ ՈՒ Մ

ՀՀ ՓԱՍՏԱԲԱՆՆԵՐԻ ՊԱԼԱՏԻ ԽՈՐՀՐԴԻ 26.12.2013թ. ԹԻՎ 33/6-Լ  
ՈՐՈՇՄԱՄԲ ՆՈՐ ԽՄԲԱԳՐՈՒԹՅԱՄԲ ՀԱՍՏԱՏՎԱԾ  
«ԱՆԴԱՄԱՎՃԱՐՆԵՐԻ, ՄՈՒՏՔԻ ԵՎ ԱՅԼ ՎՃԱՐՆԵՐԻ ՎՃԱՐՈՒՄՆԵՐԻ  
ՎԵՐԱԲԵՐՅԱԼ» ԿԱՐԳՈՒՄ ԼՐԱՑՈՒՄ ԿԱՏԱՐԵԼՈՒ  
ՀԱՐՑԸ ՔՆՆԱՐԿԵԼՈՒ ՄԱՍԻՆ

Հայաստանի Հանրապետության փաստաբանների պալատի (**այսուհետ՝ Պալատ**) խորհուրդը, մասնակցությամբ Պալատի խորհրդի նախագահ Արա Զոհրաբյանի, խորհրդի անդամներ՝ Մելանյա Առուստամյանի, Սեդրակ Ասատրյանի, Սիմոն Բաբայանի, Տիգրան Խուրշուդյանի, Հարություն Հարությունյանի, Նելլի Հարությունյանի, Կարեն Մեծլումյանի և Տարոն Սիմոնյանի,

քննության առնելով Պալատի խորհրդի՝ 26.12.2013թ. թիվ 33/6-Լ որոշմամբ նոր խմբագրությամբ հաստատված «Անդամավճարների, մուտքի և այլ վճարների վճարումների վերաբերյալ» կարգում (**այսուհետ՝ Կարգ**) լրացում կատարելու հարցը քննարկելու մասին,

## Պ Ա Ր Զ Ե Ց՝

«Փաստաբանի անդամավճարի և հավակնորդի մուտքի վճարի, փաստաբանների վերապատրաստման համար անհրաժեշտ վճարների, ինչպես նաև այլ վճարների չափերը սահմանելու մասին» Պալատի խորհրդի 05.02.2014թ. թիվ 3/8-Լ որոշմամբ (**այսուհետ նաև՝ Որոշում**) նախատեսված են դեպքեր, երբ փաստաբաններն անդամավճար չեն վճարում, օրինակ՝ 70 տարին լրանալու կամ առաջին կարգի հաշմոթյուն ունենալու հիմքով: Ընդ որում՝ նշված դեպքերում փաստաբանն անդամավճարից ազատվում է անժամկետ:

«Փաստաբանության մասին» Հայաստանի Հանրապետության օրենքի (**այսուհետ նաև՝ Օրենք**) 36-րդ հոդվածի 1-ին մասով սահմանված են փաստաբանի արտոնագրի գործողության դադարման հիմքերը: Նշված հոդվածով, ի թիվս այլոց՝ որպես փաստաբանական գործունեության արտոնագրի գործողության դադարեցման հիմք նշված են այն դեպքերը, երբ փաստաբանն, օրինակ՝ դիմում է ներկայացրել իր արտոնագրի գործողությունը դադարեցնելու համար, կամ առաջացել են փաստաբանական գործունեության

23 հոկտեմբերի 2018թ.

թիվ 19/8-Լ

սահմանափակումներ (Օրենքի 33-րդ հոդված), կամ երբ փաստաբանը մահացել է:

Գործնականում լինում են իրավիճակներ, երբ Որոշմամբ նախատեսված անդամավճարից ազատման կամ արտոնագրի գործողությունը դադարելու՝ Օրենքի 36-րդ հոդվածով սահմանված դեպքերում փաստաբանն անդամավճարից ազատման կամ արտոնագրի դադարման օրվա դրությամբ անդամավճարի պարտք է ունենում և օբյեկտիվորեն չի կարողանում վճարել անդամավճարի կուտակված պարտքը, օրինակ՝ անվճարունակ լինելու հետևանքով:

Անդամավճարից ազատման կամ արտոնագրի դադարման դեպքերում փաստաբանի համար անդամավճարի հետագա հաշվեգրում չի կատարվում, սակայն որոշակի օրվա դրությամբ անդամավճարի կուտակված և փաստացի չմարած պարտավորությունը (կետանցված պարտավորություն) Պալատի հաշվապահական հաշվառման համակարգում շարունակում է մնալ որպես դեբիտորական կետանցված պարտավորություն, որն օբյեկտիվորեն անհուսալի է:

Նշված իրավիճակն արհեստականորեն ուռճացնում է Պալատի եկամուտները:

Նկարագրված խնդիրը կարգավորելու համար առաջարկվում է «Անդամավճարների, մուտքի և այլ վճարների վճարումների վերաբերյալ» կարգում լրացում կատարել՝ Պալատին իրավունք վերապահելով օրենքով սահմանված կարգով դուրս գրել փաստաբանի անհուսալի դեբիտորական պարտավորությունը (պարտքը)՝ կետանցված դառնալու 366-րդ օրվանից: Ընդ որում՝ այդ մոտեցումը բխում է հաշվապահական հաշվառման միջազգային ստանդարտների (մասնավորապես՝ ՀՀՄՍ 37-ի) պահանջներից:

Առաջարկվող կարգավորումը կհավասարակշռի Պալատի ծախսերն ու եկամուտներն այն առումով, որ Պալատի եկամուտները չեն գերազնահատվի, իսկ ծախսերը չեն թերազնահատվի, ինչպես նաև կնպաստի Պալատի տարեկան ֆինանսական հաշվետվությունների ճշմարիտ ներկայացմանը:

Հաշվի առնելով վերոգրյալը և ղեկավարվելով «Փաստաբանության մասին» Հայաստանի Հանրապետության օրենքի 10-րդ հոդվածի 5-րդ մասի 15-րդ կետի, «Նորմատիվ իրավական ակտերի մասին» Հայաստանի Հանրապետության օրենքի 1-ին հոդվածի 2-րդ մասի, 33-րդ հոդվածի 3-րդ մասի և 34-րդ հոդվածի 1-ին, 2-րդ և 3-րդ մասերի, ինչպես նաև Պալատի կանոնադրության 16.5 կետի 31-րդ ենթակետի պահանջներով՝ Պալատի խորհուրդը միաձայն

### **Ո Ր Ո Շ Ե Ց**

- ՀՀ փաստաբանների պալատի խորհրդի՝ 26.12.2013թ. թիվ 33/6-Լ որոշմամբ նոր խմբագրությամբ հաստատված «Անդամավճարների, մուտքի և այլ վճարների վճարումների վերաբերյալ» կարգը լրացնել նոր՝ 9.<sup>2</sup> կետով՝ հետևյալ բովանդակությամբ. **«9.<sup>2</sup> Այն դեպքում, երբ փաստաբանը Պալատի ներքին իրավական ակտով սահմանված կարգով ազատված է անդամավճար վճարելուց կամ վերջինիս փաստաբանական գործունեության արտոնագրի գործողությունը դադարել է և անդամավճար վճարելուց ազատման կամ արտոնագրի գործողության դադարման օրվա դրությամբ փաստաբանն ունի**

**անդամավճարի անհուսալի դեբիտորական կետանցված պարտավորություն, ապա Պալատն իրավասու է օրենքով սահմանված կարգով փաստաբանի անհուսալի դեբիտորական պարտավորությունը (պարտքը) դուրս գրել՝ կետանցված դառնալու 366-րդ օրվանից: Սույն կետով նախատեսված հիմքով անհուսալի դեբիտորական պարտավորությունը (պարտքը) դուրս գրելու մասին որոշում է կայացնում Պալատի խորհուրդը»:**

Հայաստանի Հանրապետության  
փաստաբանների պալատի  
խորհրդի նախագահ՝

Արա Զոհրաբյան

**23 հոկտեմբերի 2018թ.  
թիվ 19/8-L  
ք. Երևան**